

Ta bay introduci traimerdia pa scolnan secundario



ORANJESTAD — Ta bay introduci ‘naschoolse opvang’ pa hobennan na scolnan secundario. Cuminsando na september, lo bay tene un proyecto piloto pa cuminsa cu esaki. Mirando cu ta trata di un proyecto conhunto di ministerio di Asuntonan General y ministerio di Enseñansa, prome minister Mike Eman y minister Michelle Hooyboer-Winklaar a haci e anuncio ayera durante conferencia di prensa semanal di Consejo di Minister.

Dia 7 di februari a institui via decreto ministerial un grupo di trabou cu lo mester duna conseho riba introduccion di ‘naschoolse opvang’ pa hobennan den scol secundario. Prome minister Mike Eman a indica cu idea aki, di ofrece hobennan un luga na scol na unda nan por traha huiswerk y recrea sanamente ta central den plan di gobernacion di su di dos gabinete. E proyecto di Traimerdia pa scolnan basico a muera di ta exitoso, segun e prome mandatario y tin un demanda pa bin cu

esaki pa muchanan cu ta bay mavo, EPI, havo y VWO. Ora a yega pa tuma pasonan concreto, segun prome minister Eman y awo a yega na un proyecto cu ambos su ministerio y esun di Enseñansa ta bay carga. Pa loke ta ministerio di Enseñansa, e link ta obvio den sentido cu den ‘naschoolse opvang’ aki ta bay duna oportunidad pa hobennan sigui desaroya nan mes academicamente. Pa loke ta ministerio di Asuntonan general, e interes ta pa e aspecto comunitario, na unda ta duna e hobennan un

ambiente sigur na unda nan por desaroya nan mes como ciudadano pero tambe desaroya nan mes personalmente.

500 mucha

Ta bay cuminsa cu un grupo di 500 estudiante na diferente scol den diferente bario. Hobennan lo bay ‘naschoolse opvang’ den na mesun scol di dialuna pa diabierna entre 2’or di merdia y 5’or di atardi. Eynan y bou guia di profesionalnan (ta bay traha cu personanan cu ya caba ta riba ‘payroll’ di gobierno), nan lo haci nan huiswerk.



Esey lo bay ta e parti obligatorio di e programa. Ta bay tin cuminda na e sitio pa e muchanan. Despues tin posibilidad pa participa den un programa diversifica cu ta inclui Desaroyo Personal y Desaroyo Ciudadano te 6’or di atardi. E prome ta busca pa e hoben siña y practica tareanan di tur dia y tambe e hobby cu mas ta hala su atencion. E parti aki ta consisti di actividadnan manera deporte y arte. Bou di Desaroyo Ciudadano ta bay busca sosten di Organisacionnan No Gubernamental pa crea consenshi riba diferente tema ademas di stimula participacion comunitario y trabou boluntario. E idea ta pa yega na ‘naschoolse opvang’ pa hobennan entre 12 y 18 aña, pero e grupo piloto ta bay consisti di muchanan den ciclo basico, pues entre 12 y 13 aña. Mayornan di e hobennan den grupo piloto lo no mester paga pa e ‘naschoolse opvang,’ pero despues lo bay mira si cuanto lo mester paga. □